

Grupo di periodista hende muhe a participa den tayer di RAPP



CU e obhetivo di conmemora e Dia Internacional di Hende Muhe, Red Arubiano di Prensa Profesional (RAPP) a organisa un tayer dirigi na periodistanan femenino denomina **'Reporting Safely for Women Journalists'** p'asina enfoca riba seguridad y salud mental di esnan cu ta eherce e trabou di prensa.

E evento, cu a tuma luga diasabra 15 di maart na Impact Hub Aruba, a uni un grupo di periodista femenino cu pa hopi biaha ta enfrenta desafionan cu ta afecta tanto nan seguridad fisico como nan bienestar mental. For di 'online bullying' y discriminacion den trabou te cu cubri temanan sensitivo manera corrupcion politico y inhusticianan social. E situacion aki hopi biaha ta resulta den menasa, agresion y discriminacion cu ta aumenta e risiconan di stress, cansancio mental y aislamiento profesional.

Door di crea un plataforma pa comparti experiencianan nan kier kibra e aislamiento aki y demostra cu ta bon pa pidi ayudo. Na mesun tempo, nan a enfoca riba hermentnan practico pa maneha stress, desaroya strategianan pa enfrenta desafionan, pone enfoca riba cuida personal y mehora seguridad en general.

Un danki grandi ta bay n'e fundacion MamaCash cu a haci e tayer aki posibel. MamaCash ta un organisacion cu entre otro ta apoya hende muhe den boga pa nan derechonan y

esaki a alinea cu RAPP su meta pa empodera e periodista cu conocimiento y confianza pa nabega e presionnan di periodismo mientras ta proteha nan bienestar.

E tayer a trece un sentimento di union y apoyo entre e participantenan, compartiendo experiencianan personal y siñando di otro tocante desafionan di e profesion periodistico.

Den e sesionnan dinamico ofreci p'e psicologo y coach Sabrina Sonensein, e participantenan a haya capacitacion practico pa maneha stress, tipnan pa tin un bon salud mental y desaroya strategianan pa enfrenta menasanan y agresionnan cu por afecta nan trabou diario.

Red Arubiano di Prensa Profesional (RAPP) cu ta dedica na stimula e practica liber di periodismo y normanan di comportacion etico y asina ta traha pa inspira y educa e periodistanan actual y futuro periodistanan pa medio di desaroyo profesional. Tambe ta proteha e garantianan fundamental di libertad di expresion y libertad di prensa pa medio di su esfuersonan di defensa.

Un invitacion ta bay n'e gremio periodistico na Aruba cu ainda no ta riba e lista di contacto pa manda un e-mail pa haya mas informacion tocante RAPP y con por bira miembro.

P'esaki por tuma contacto cu Red Arubiano di Prensa Profesional via email: rapp.aruba@gmail.com.